

卷八 人物

周 秦 唐 明 清 周后妃 節烈

附勘誤表

岐山縣志

家題



人物勘誤表

卷次頁次行次字數						誤	正
八	七	四	二六	謚			溢
八	七	一三	二三	嘗			賞
八	七	一七	一九	候			侯
八	八	七	二三	冤			冤之獄
八	二〇	三	三〇	驪			鄺
八	二六	二〇	一三	側			側須
八	二七	一四	二四	辛			癸
八	二八	一	二九	書			勳
八	二八	二三	三	甲			申
八	二九	二	二〇	甲			申
八	三六	二〇	九	產			彥
八	四五	一〇	二三	人			女
八	四九	六	二三	夫			未

岐山縣志卷之八

縣長

興平田惟均重修

邑人白岫雲

薛成兌

龐繼統編次

人物

岐山人物之盛莫如周室文武周公父子一堂聖聖相承亘古未有兩漢之世寂焉無聞至唐時有劉感諸人別無可考宋世亦無稱者元則以岐人而任岐者數人即不能筮仕立朝勲業彪炳夫豈無修德篤學義氣自矢者耶年湮代遠磨滅弗彰可勝嘆哉至若懿德闡範本與丈夫媲美故劉子政作列女傳乃自范蔚宗傳蔡文姬爲劉知幾所誚後之作史者專以節烈爲尙豈偏重歟無他賢淑庸德也庸故傳者少節烈奇行也奇故傳者多然歷代旌表節烈必據事實其有類於畫荻丸熊之事者處常之德與遭變之節亦各爲之表彰是固並行不悖也今於岐之人物自周家君臣以至今日凡居於岐生於岐者畧爲敘傳而節烈婦女亦附志焉

重刊岐山縣志 卷八
岐山名稱自周太王西遷後始見於經傳至王季文武周公父子兄弟聖聖相傳世德作求王迹遂肇又有姜嫄太姜太妊諸聖后聖母內成賢助周之八百年長久鴻業遂於是乎宏開此在他邑藉其一遊一豫莫不假爲光寵况生於斯長於斯聚國族於斯顧可聽其散佚而不傳耶胡志畧而不載迄今不無遺憾昔王阮亭評秦志推康對山武功志爲第一今攷其書人物志首列后稷節烈門先敘姜嫄非無謂也茲值重修時期敬將周初聖君聖相聖后分別列入俾周之功德亘古常新並亦見今之岐即古之岐古之岐即周之舊治也至飲水思源援古愆今士感菁莪之化俗成采芣之風是在來者茲不敢妄贅民國二十四年二月一日邑人白岫雲敬識

周

太王 古公亶父公劉世孫也居邠狄人侵之事之以珠玉犬馬俱不得免乃囑耆老而告之曰狄人之所欲者吾土地也君子不以養人者害人我將去之遂於蒿小乙二十有六祀甲寅遷於岐山之周原改號曰周後武王有天下追尊爲太王

泰伯仲雍 皆太王子也太王三子長泰伯次仲雍次季歷季歷又生子昌有聖德太王欲傳位季歷以及昌泰伯知之即與仲雍逃之荊蠻魯論云泰伯其可謂至德也已矣三以天下讓民無得而稱焉

王季 商太丁丁卯元祀命周公季歷伐燕京之戎庚午命周公季歷爲牧師伐始呼之戎又伐豳徒之戎獲其三大夫太丁嘉其功賜之圭瓚鉅鬯命爲侯伯

文王 商帝乙七祀季歷薨文王即西伯位西伯治岐發政施仁鳳凰鳴於岐山西伯詢於八虞咨於二虢重之以周召畢榮治岐仁政征伐事績載在經史茲不復贅武王 商帝乙二十有三祀壬辰武王生

周公 文王子武王同母弟佐文武有大勳勞制禮作樂教化大行武王崩成王年十三歲即位周公相踐祚而治南面負扆以朝諸侯書大誥君奭無逸立政諸篇皆公所作周禮周官皆公所定

召公 亦姬姓名奭嘗布文王之化憩甘棠下後人思其遺愛不忍伐其樹官至太

保

太公 姓姜名尙其先祖嘗爲四岳佐禹平水土封於呂尙其苗裔也文王將出獵卜之曰非龍非鰲非熊非羆非虎非貔所獲霸王之輔果遇呂尙於渭水之陽與語大悅曰吾先君太公曰當有聖人適周周因以興子真是耶吾太公望子久矣故號之曰太公望載與俱歸立爲師謂之師尙父

康叔 名封文王子武王同母弟爲司寇

聃季 文王子武王同母弟爲司空

虢仲 王季子爲文王卿士勳在王室

虢叔 同上

畢公 亦姬姓名高因封於畢故稱畢公

榮公

太顛 姓太名顛按墨子文王舉太顛閔夭於罩網之中授之以政兔置之詩即詠

此事

閔夭 姓閔名夭紂囚文王於羑里閔夭求有莘美女驪戎文馬有熊九駟獻之紂紂大悅乃釋文王

散宜生 姓散名宜生書君奭言散宜生與閔夭太顛南宮适四人咸劉厥敵可見周有天下四人武功最多

南宮适 姓南宮名适今扶風有南宮莊其裔也

秦

蹇叔 高店里蹇家溝人春秋時仕秦稱爲賢相秦將潛師伐鄭穆公訪諸蹇叔蹇叔曰勞師以襲遠非所聞也師勞力竭遠主備矣無乃不可乎穆公不聽遂起師卒爲晉師敗於殽

事見左傳今五星堡有蹇叔祠堡在蹇家溝上

唐

劉感 岐州鳳泉

唐屬岐山

人後魏司徒豐生孫也武德初以驃騎將軍戍涇州爲薛仁

杲所圍糧盡殺所乘之馬啖士而煮骨自飲至和木屑以食城垂陷長平王叔良救之賊乃解與叔良出戰爲賊執還圍涇州令感約城中降感給諾至城下大呼曰賊大飢亡在朝暮秦王數十萬衆且至勉之無苦仁杲怒執感埋其半土中馳射之至死詈益甚賊平高祖購得其尸祭以少牢贈瀛州刺史爵平原郡公封戶二千諡忠壯詔其子嗣封爵賜田宅焉今祀鄉賢

李淳風岐州雍人

屬岐山

父播仕隋高唐尉棄官爲道士號黃冠子以論譔自見淳風

幼爽秀通羣書明步天歷算貞觀初與傅仁均爭歷法議者多附淳風故以將仕郎值太史局制渾天儀詆撫前世得失著法象書七篇上之擢承務郎遷太常博士改太史丞與諸儒修書遷爲令太宗得秘讖言唐中弱有女武代王以問淳風對曰其兆旣成已在宮中又四十年而王王而夷唐子孫且盡帝曰我求而殺之奈何對曰天之所命不可去也而王者果不死徒使疑似之戮淫及無辜且陛下所親愛四十年而老老則仁雖受終異姓而不能絕唐若殺之復生壯者多殺而逞則陛下子孫

無遺種矣帝采其言止一日奏北斗七星當化爲人明日至西京市飲酒帝使人候之有胡僧七人入自金光門至西京酒肆飲酒使者宣勅七人笑曰此必淳風小兒言也忽不見淳風於占候吉凶若節契然當世術家意有鬼神相之非學習可致終不能測也以勞封昌樂縣男奉詔與算博士梁述助教王真儒等是正五曹孫子等書刊定註解立於學官撰麟德歷代戊寅歷候者推最密自秘閣郎中復爲太史令卒所撰典章文物志乙巳占等書傳於世子該孫仙宗並擢太史令今祀鄉賢

和逢堯 岐州岐山人武后時負鼎詣闕下上言願助天子和飪百度有司讓曰昔

桀不道伊尹負鼎於湯今天子聖明百司以和尚何所調逢堯不能答流莊州十餘年乃舉進士擢監察御史突厥默啜請尙公主逢堯以御史中丞攝鴻臚卿報可默啜遣貴近頡利來曰詔送金縷具鞍乃塗金非天子意使者不可信雖得公主猶非實請罷和親欲馳去左右色動逢堯呼曰我大國使不受我辭可輒去乃牽持其人謂曰漢法重女婿而送鞍具欲安且久不以金爲貴可汗乃貪金而不貴信耶默啜

聞曰漢使至吾國衆矣斯食鐵石人不可易因備禮以見逢堯說之曰天子昔爲單于都護思與可汗通舊好可汗尙嚮風慕義襲冠冕取重諸藩默啜信之爲斂髮紫衣南面再拜稱臣遣子入朝逢堯以使稱旨擢戶部侍郎坐善太平公主斥朗州司馬終柘州刺史逢堯詆詭當大事敢徼福故卒以附麗廢然唐興奉使者稱逢堯

張知謩

字匪躬幽州方城人徙家岐兄弟五人知元知晦知泰知默皆明經高第

曉吏治清介有守公卿爭爲引重知謩歷十一州刺史所蒞有威嚴武后嘗降璽書存問中宗在房州時禁察苛嚴知謩與董元質崔敬嗣繼爲刺史供億保戴不少弛帝復位拜知謩左衛將軍加雲麾將軍范陽郡公歷東都副留守左右羽林大將軍同華州刺史大理卿致仕年八十開元時卒爲人敏且亮惡請謁求進士或不才冒位視之若仇每勅子孫經不明不得舉家法可稱云知泰歷益州長史中臺左丞兵部侍郎封陳留縣公後忤武三思出爲并州刺史天兵軍使終魏州刺史謚曰定知默左臺侍御史知元子景昇知泰子景佚開元中皆顯宦

明

胡貞 由洪武時舉人任永和令永和素荒殘貞買牛種治耕具教民樹藝後擢知應州改廣德俱有循聲

張恪 永樂初爲諸生時肄業於卷阿周公廟之西岩洞中有道士居鄰洞垢面敝衣數至恪處相與亂談恪厭之而未絕也一日大雪炊飯無菜須臾間道士持青菜至云自成都取來恪以爲癩出視雪中無足跡始知其非常人也由是加禮敬焉將別去告恪曰吾元元子張三豐也汝有欲乎恪曰欲讀書能久記耳遂附恪耳默祝自是恪讀書一過終身不忘後舉甲午解元歷官山東臨淄訓導睢州陳州潼川州學正所至造士有法學者宗之

李善 字元吉正統己未進士初知黎城縣黜嚴峻尙寬平及陞汾州知州亦多善政民間有清廉之頌三載復陞正定知府時門役有董繼漢者資性異常善以爲才即令與其子讀書以成其學繼漢果登甲第善至四川叅政以病乞歸居家孝友宗

黨無間言宜入鄉賢

梁禧 在城里人建廷高祖也正統五年歲大饑斗粟千錢禧出粟五百石助賑當時聞其事於朝上義之賜以官辭曰吾民也如受官不幾以粟易官乎乃勅賜曰義民

郭宗舜 正統時諸生有膽畧涉獵書史切於民瘼值貴官能詠詩以諫時有羣盜聚劫遠近諸司傳檄襲捕不得宗舜以計擒之有司上其事授巡檢後歲凶軍民流離詔求直言宗舜伏闕上十事極論時弊指斥權要末復繫之以詩英廟採行焉再授鄴縣巡檢會御史楊綱夜經其處宗舜盤詰如法綱怒劾以輕侮風憲宗舜亦抗章辨奏上直之及土木之變入塞省候進衣物論功陞都督僉事

楊恭 字克敬幼孤鞠於舅氏性穎異讀書日記數千言比壯益明經術登天順甲申進士歷官通政司右通政奉勅督理河道時運河潰決同平江伯陳瑄贊畫修理明年底績成化末關中大飢岐人多往任就食恭捐俸易粟以饋養歸途猶有贈遺

又遣人持俸金至岐以助鄉里之不能來者所活數百人致仕歸每歲種瓜以濟夏日行人遠近親疏咸感之今祀鄉賢

李俊 少孤無兄弟安貧力學事孀母樵採易粟雖寒暑不懈登成化己丑進士官吏科都給事中彈擊奸回權要斂跡嘗言事忤旨置構櫬以待後出爲湖廣叅議陞山西叅政所至有德政及人廉靜無求歸家囊篋蕭索晏如也居鄉和睦始終如一今祀鄉賢

陳倫 年十七父官穎上適有疾倫聞之徒步往省侍湯藥祈天願以身代及卒扶柩歸途行至三千里足指破爛未嘗乘騎後登成化乙未進士歷官長蘆運使貨賄常例一切罷革餘緡悉以輸官致政歸囊無長物怡然自樂性方嚴平居無一戲言治家內外肅然人多敬之宜入鄉賢

宋德 成化乙未進士初任溫縣知縣法度嚴明宅心仁恕擢浙江道御史遷四川僉事副使剛明果斷清介有守故人稱之曰作令定溫輦之田巡按洗焚死之冤持

重刊山縣志 卷八
憲靖王剛之亂蓋宦績之表著者

楊武 字宗文宏治丙辰進士知淄川縣鋤惡弭盜課耕織積倉粟拓學規興詩書賑貧乏疏淄河灌田利賴甚溥召拜監察御史按河南正德初按順天諸郡縣時劉瑾用事事多牽制武通達下情宣布朝廷德意一切敷陳無所顧避擢大理寺左寺丞勘視大同邊務彈劾屯田不均軍役耗損諸弊政不少貸超拜左遷都御史巡撫宣府罷歸高才多學善晉書古文歌詩有文集法帖藏於家

孟醇 由舉人任良鄉知縣振舉衰敝訟理政平擢御史有劉瑾黨魏斌亂鹽法醇以成憲折之斌懾服陞成都知府駱胡盜起醇殄其渠魁散其餘黨陞叅政丁內艱不復仕日與田夫野老敘禮敦俗優游二十餘年人無大小接與甚溫聞人言是非微笑不與辨鄉人稱爲長者宜入鄉賢

張瑗 由嘉靖辛卯舉人任沙河知縣博辨英發出語驚人見人善極口稱揚虛己以從值境內多故瑗日夜憂惶勤於部署百姓卒賴以安然體素清癯因勞致疾卒

人多以未究厥施惜之

徐衡 字大經幼聰穎博覽羣書尤潛心正學事父母能得歡心親疾嘗呼天請代族兄仁病革托寄百金撫孤及成立衡仍以原金付之由嘉靖庚子舉人知高唐州以清介自持歲大旱禱雨輒應又捐俸賑饑活數千人值漕河汎溢運航多阻衡督民分渠以殺水勢夜宿河涯凡三越月而漕運以通繼知應州勤於民事日夜不遑因勞致疾乞歸居家課後進睦宗族鄉人有喪不能葬疾不能療者輒以資藥贍之人皆德焉所著有奧山詩義今祀鄉賢子明萬歷壬午舉人登乙未進士初知聞喜縣繼任確山擢刑部主事循績久彰三晉卓猷新懋兩河人咸惜其未究厥施云

楊楠 字伯直性孝廉正不喜浮華潛心理學中嘉靖壬子第二鄉魁父宦秦藩病篤楠省視徒步扶輿而歸足指血出躬耕養親父卒哀毀盡禮屢試春闈不第以母命謁選得陽曲教諭明正學以興士類士皆宗之會纂修世廟實錄既成陞霍山知縣居官廉潔均田賦抑豪強築城墉以防外患勤苦至損其齒時倭寇自九江入境

勢甚猖獗楠倡義勇冒矢石擒數十人餘皆遁去事聞欽管白金一鎰官霍三年以
母老不能迎養遂告歸行李蕭然一如寒士母病篤祈以身代侍湯藥衣不解帶者
三月母卒號痛幾絕飲食俱廢時值冬寒於柩側寢苦枕塊晝夜哭不輟以過哀成
疾而終聞者皆爲流涕所著有岐麓文集今祀鄉賢

梁豎 渭陽里人素性正直嘉靖十三年佐主簿候儒均平地糧公正無私舉爲義

民

劉鳳岐 同峪里人嘉靖中任巡檢岐生四十日母亡十二歲父亡祖母李氏育之
成立岐事李曲盡孝道李有疾必籲天祈代李年八十卒葬南山下岐廬墓側負土
成墳雖風雨深夜虎狼出沒俱不避有雉兔馴集之異有女病革家人迫勸歸視岐
跪告墓側不忍離去女死得甦後岐夢李運水來家次日隣舍火延至岐舍風反火
息人以爲純孝所感當事者匾其門曰孝孫之第

楊紹程 工詩文尙氣節萬歷丙子中第四鄉魁時岐俗膺鄉薦者例得派里人助

粟百石紹程獨却之皆知程非志溫飽者萬歷癸未成進士改翰林庶吉士尋授河南道監察御史凡疏奏皆人所憚言有郊廟不親朝講不御儲貳不建匹嫡當辨之語巡按滇南嘗疏沐舍人僭修平鄧子龍之騰躁又嘗參政晉藩笞逐權要雖直道招忌不悔也歸休後修邑中泰伯廟及仲雍祠倡旌李烈女小園皆事關風化者所著有館課宏詞詩文集今祀鄉賢

曹暹 萬歷己酉第二鄉魁登天啓壬戌進士任猗氏知縣有德政人咸感之巡按江淮振厲風采肅清僚吏尋叅議冀甯平晉藩之亂釋沉寃及告歸寇攻岐城出夙養壯丁守禦賊驚潰城賴以全

李樹聲 萬歷己酉舉人知猗氏縣廉靜不擾有德及人丁內艱不復仕闖逆徵之使仕聲曰吾家六世受國恩今安往乎即夕呼天而逝

梁建廷 萬歷乙卯第三鄉魁登丙辰進士官大理寺寺正多所平反主考四川出守河南廉明仁恕嘗請旨賜程邵二賢後裔爲博士俾供祭祀士論歸美歷山東兗